

Ün stupend agüd per pitschen e grand

I'l Chesin Manella as ho pudieu battager ün dc speciel

■ (anr/map) Üna gruppa da mussedras sün iniziativa d'ün musseder ho creo ün disc cumpact dobel (dc) cun istorgias per iffaunts da scoulina. A Schlarrigna ho gieu lö il battaisem da quist'ouvra. Ad es cuntschaint cha'ls iffaunts in Engiadin'Ota odan rumauntsch bod be a scoula u a scoulina e que nu basta. Per ch'els possan tadler e schlarger il vocabulari haun las tschinch mussedras *Martina Gir* da Champfer, *Madlaina Falett* da S-chanf, *Annina Nicolay* e *Simone Pedrun* da Samedan ed *Annigna Nogler* da Puntraschigna creo ün nouv mez. L'iniziativa es gnida da *Daniel Manzoni* chi'd es musseder a Segl e chi'd es eir sto il motor dal proget cul titel «Istorgias puteras».

Paperlapip

As tratta dad 11 istorgias inventadas dad els sves o tradüttas dal tudas-ch. Quistas istorgias reflettan l'andamaint d'ün

an da scoulina ed a vegnan trattos evenimaints tipics. Il prüm disc cumpact cuntegna evenimaints chi capitan dürrant la prüma mited da l'an cul cumanzamaint da scoulina, la spassageda e'l di dal Niculaus. Impü vain quinteda l'istorgia «Üna chesa per tuots» tenor il cudesch cuntschaint. I'l seguond disc cumpact sun las istorgias d'inviern e da prümvavaira chi sun cumplettedas dal raquint da l'Uorsin da Selina Chönz/Alois Carigiet. Tuot las istorgias sün accumpagnadas da musica e vegnan prelettas sper *Martina Gir* e *Simone Pedrun* chi haun fat part al proget eir auncha da *Flurina Plouda Lazzarini*, mussedra a Samedan e da *Roman Pünchera*, magister primar da Segl.

Üna novited geniela

Que chi'd es speciel tar quist mez es l'aggiunta da texts respectiv fögls da las istorgias. In fuormat da PDF paun ils ge-

nituors leger zieva il raquint e survegnan auncha spiegiations da plets pü difficils u importants per l'incletta dal text. Impü sun agiunts disegns da robas chi vegnan manzunedas in l'istorgia da maniera cha taunt iffaunt scu creschieu imprenda ün nouv pled. Ad es üna metoda didactica fich buna chi güda a rinfurzer e mantgnair il rumauntsch, in quist cas il puter. A tadler las istorgias ed a guardar ils fögls accumpagnatorics culs disegns as bada cha quist'ouvra es gnida fatta cun grand plaschair ed idealissem. Ad ho pretais ün grand ingaschamaint da bgeras personas per realiser quist proget que cha's ho pudieu constater cur cha *Annigna Nogler* ho ingrazcho a tuot quellas personas chi haun güdo, da maniera pratica u finanziaria, fin cha'l mez attractiv es sto realiso.

Il dc dobel «Paperlapip» po gnir retrat tal Chesin Manella fin als 15 da favrer per 28 francs, zieva cuostaro'l 33 francs.

A la gruppa dal proget «Istorgias puteras per iffaunts» haun fat part: **Daniel Manzoni, Simone Pedrun, Annigna Nogler in pè; Annina Nicolay, Madlaina Falett e Martina Gir (da schn.).**

FOTO M. PULT



LA QUOTIDIANA, 8.2.2008

CHESIN MANELLA, UNIUN DALS GRISCHS, LIBRARIA,
7505 SCHLARIGNA
TEL. 081 833 18 12 FAX 081 833 18 03